

SOMARE LAIKIM WANTOK

Long taim kabinet i Kibung long Wewak mipela WANTOK i bin askim ol minista long tingting bilong ol.

Olgeta minista wan wan i amamas tru long WANTOK niuspepa na wok em i mekim. Ol yet i save kisim olgeta taim na ritim. Na ol minista bilong Papua tu i ritim.


Mista Somare i tok, olgeta taim em na meri bilong em Veronika i sindaun ritim olgeta pes bilong em. Na em tu i amamas wantaim ol minista long gutpela pasin bilong WANTOK long ripotim olgeta tok na wok bilong gavman stret tru.

Mista Somare i tok em i laikim WANTOK moa olsem POST COURIER.

Namba wan minista i tok em i laik bai dispela niuspepa i mas kamap long han bilong olgeta manmeri bilong Papua Niugini. Em i tok em i bin tok long ol hetman bilong dipatmen bilong edukesen em i laikim tumas bai ol i mas helpim bai ol tisa na moa na moa skul bai baim WANTOK niuspepa.

Na tu, em i tok, em i gutpela samting tru ol laibreri bilong wan wan skul i mas gat dispela WANTOK BUK (lukim pes 10 insait long pepa.) i stap bai ol sumatin i ken ritim ol nius bilong yia i go pinis, na ol stori bilong tumbuna na ol tingting bilong ol narapela man i stap long ol pas i kam long edita.

Mipela i bin askim tu



Namba Wan Minista, Mista Michael Somare, i sindaun kisim win long haus bilong em long Wewak na ritim WANTOK niuspepa wantaim liklik Berta.

Dokta Reuben Taureka, em Minista bilong bosim olgeta skul. Maski em i bilong Papua, em i tok em tu i laik bai olgeta skul i mas gat WANTOK.

Em i laikim WANTOK long wanem i gat gutpela toksave na nius insait long en. Na i gat gutpela skul long olkain save i ken helpim ol manmeri long skul.

Dokta Taureka i tok amamas long ol man bilong WANTOK olsem: Yupela i bin mekim gutpela wok tru long skulim ol pipel long ples. A-

rapela niuspepa i tingtasol long ol saveman. Yupela long WANTOK i helpim ol liklik man na ol man long ples long olkain poto na stori inap long save bilong ol.

Sir Paul Lapun i kam lukim olgeta ofis na ol woksap bilong WANTOK niuspepa.

Ol wan wan minista i laikim tumas dispela WANTOK BUK. Na Sir Maori Kiki i kisim 10-pela olgeta bilong karim i go soim ol man long Saina. Em i tok WANTOK i gutpela eksampel long ol.

YU KEN PAINIM INSAIT:

Ol pas i kam	p. 2
Y.C. kibung ripot .	p. 4
Stori tumbuna	p. 5
Kabinet nius	p. 6
Poto pes	p. 8
Man skelim graun .	p.10
Nupela stem	p.11
Fantom	p.14
Sip bilong bus ...	p.15

Sapos yu gat tok, yu raitim sotpela tasol. Sapos yu raitim longpela, bai mipela i sotim. Yu mas raitim nem bilong yu tru long olgeta pas i kam long mipela. Sapos yu no laik mipela i prinim nem bilong yu tru, orait yu raitim wanpela narapela nem bilong yu.

ASKIM RET KROS

Dia Edita.- Hia mi gat liklik askim long ol Ret Kros o ol man bilong kisim blut.

Mi laikim ol Ret Kros yet i mas bekim dispela askim bilong mi. Em hia dispela askim bilong mi. Taim ol Ret Kros i kam kisim blut pinis na ol i go bek long taun, na bihain ol i salim ol hap pepa i go long ol man na meri i bin givim blut long en. Na insait long ol pepa ya ol i bin raitim olsem, blut bilong mi i stap long grup "A" na blut bilong mi i grup "B" na blut bilong mi i grup "O".

Olsem na man na meri i kisim blut "A" na "B" i tok, man na meri i bin kisim blut grup "O" i no strongpela. Na man na meri i kisim blut grup "A" na "B" em blut bilong ol i strongpela.

Mi wanpela bilong ol i kisim lain grup "O". Olsem na mi laikim Ret Kros i mas bekim pas bilong mi na tok stret olsem, A na B i strongpela o "O" i strongpela blut. Plis ol brata na susa long Ret Kros, olsem mi no klia tumas na mi askim yupela.

Pius B. Gerry,
Timbunke/E.S.D.

RET KROS BEKIM TOK

Dia Mista Pius Gerry, Hia mi laik bekim pas bilong yu long askim long blut grup.

Yes bekim bilong mi i go olsem, olgeta blut

grup i wankain tasol na i no gat wanpela i save strong na narapela i no save strong. Olgeta i wankain tasol.

Sapos yu i gat blut grup "O, A, B, AB, olgeta i wankain.

Wanpela samting i narakain liklik, em i sapos yu gat blut grup "O" em i moa gutpela tasol long ol narapela blut grup, tasol man o meri i gat blut grup "O" ol dispela man i ken givim i go long ol lain man o meri i gat blut grup "A, B, o AB".

Mipela i tokim yu, yu i gat gutpela blut, na blut bilong yu i ken helpim ol man i gat blut grup "A, B, AB." "Tasol blut grup "O" i no inap long kisim long ol man i gat "A, B, AB".

Long inglis ol i save kolim Yuniversal Donor em long blut grup, "O" bikos man i gat "O" blut grup em i ken helpim ol narapela blut grup, sapos nogat blut grup "A, B, AB."

Wanpela eksampel hia: Sapos Mista Joseph i gat blut "A" na meri bilong em Josepha i gat blut "O" na man bilong em i no inap long givim i go long meri bilong em. Bikos blut bilong em i "A".

Na sapos meri bilong em i ken givim blut i go long man bilong em, orait, em i min olsem: Meri bilong Joseph, Josepha i gat blut grup "O". So em tasol nau long dispela bekim bilong mipela ol manmeri i wok long Ret Kros.

Raphael Nimiuru,
Boram/Wewak.

DAUNIM DRING

Dia Edita.- Nau mi laik autim liklik wari bilong mi. Tingting bilong mi i go olsem:

Mi lukim wanpela samting i no stret long ai bilong mi. Sampela man i tok olsem:

"Kam yumi go dring na bai yumi kamap man tru na i stap amamas". Na ol i tok bai yumi dring na pinisim wanpela kat-en bia.

Nau long nius yumi save harim olsem planti ka i bam, sampela i pait na ol arapela hevi tu i kamap long yumi.

As bilong dispela samting i kamap, em long dring tasol. Dring i save daunim tingting bilong man na ol samting olsem i save kamap.

Long wanem, ol man i dring planti bia, wiski na ol narapela strongpela dring olsem.


Sampela man i pilim olsem bia i givim gutpela taim long ol. Ol i ting em i swit moa long maus bilong ol.

Sampela man i pilim olsem, ol i gat liklik pen i stap long bodi bilong ol, na ol i ting dring bai pinisim dispela pen long bodi bilong ol.

Na tu planti ol man i save i gat bikpela bel-hevi, olsem na ol i ting ol i dring bai bia i pinisim dispela belhevi bilong ol.

Ol i laik lusim dring tasol dring i bosim laip bilong ol.

Tasol dispela tok i no tru. Dring i no save givim strong long yumi. Nogat tru. Dring i save daunim o sotim strong na laip bilong yumi. Em i tru olsem man i gat strong tasol taim man i dring, dring i save i go insait na bagarapim



BRIAN NAMIAT edita bilong ol pas i save kam long mipela long Wantok niuspepa.

TOKSAVE

Mi, edita bilong ol pas, nau mi laik askim yupela olgeta pipel long salim planti moa pas i kam long mipela long prinim long Wantok niuspepa.

Sapos husat i gat ol sampela askim, wari, tingting, na ol aidia, rait tasol i kam long mipela, na bai mipela i amamas tasol long prinim tingting bilong yu insait long Wantok.

Traim na salim ol gutpela pas tasol i kam long mipela. Yu no ken salim pas i krun-gutim nem na wok bilong narapela man.

Lukaut. Bipo yu autim sampela nius i hait yu mas save tru tru long en. Nogut yu kot sapos man i painimaut yu raitim tok giaman tasol. Nogut yu statim wanpela pas long dispela tok: mi harim ol i tok. Nogat. Kain tok olsem em i tok win. Na pas em i no tok win. Pas i mas tok long samting i tru.

Em tasol. Tenkyu.
Mi Brian Namiat

lewa na bodi bilong yumi. Sampela bilong yumi inap long i kamap long olgeta long dring bia tasol.

Sapos man i dring planti, em inap long i dai kwik long taim em i stap yangpela yet.

Ol wantok ating yumi mas isi liklik long dring pasin nogut yumi lus olgeta.

Em tasol long liklik wari bilong mi. Tenkyu. Johnas W. Avenny, C.T.C Erave/SHD.

LAIKIM STORI BILONG WOA

Dia Edita.- Mi no klia long taim bilong woa. Ol samting i kamap olsem wanem?

Mi laikim bai yupela i stori gut long dispela. Dispela namba 2 woa i bin kamap long yupela olsem wanem? Tru ol man i stori long maus tasol na mi harim. Na nau yupela i mas raitim long Wantok Nius, na bai mi i ken lukim na ritim.

Mi askim yupela long stori long mi. Plis, raitim longpela stori.

Feros Nauapa,
D.T.P. Skul,
Kainantu/E.H.D.

MASKI KOLIM NEM KATOLIK

Dia Edita.- Mi laik bekim pas bilong Alex John Hanumbo bilong Panguna.

Mi harim Minista bilong yumi, Mista Michael Somare, i tok i no long taim bai mipela i kisim Independens long mun Jun 1975.

Em i tok long man i mas wok hat long ol arapela wok long kirapim bisnis long kantri bilong yumi. Dispela tok mi harim. Namba tu, yu tok olsem: Em i no bosim sol bilong ol o wan wan.

Orait, nau mi tokim

yu. Sapos yu no laikim toktok bilong em, orait. Yu no ken raitim nem Katolik bilong yu, na ol i no ken kolim nem katolik bilong yu. Bikos Alex na John em i no nem bilong tumbuna bilong yu. Nogat. Olgeta nem katolik, em ol lain bilipman bilong God, ol i bihainim lo bilong em wantaim pikinini bilong em Jisas Kraist.

Taim yu raitim nem bilong yu stret bilong ples o nem papa i bin kolim long en. Mi pilim tingting bilong yu i olsem manki i stap long standet l o prep klas long Praimeri Skul.

Mi ting bai planti manmeri i bekim pas bilong yu. Mi skelim pas bilong yu i no stret. Sapos yu wari, rait tasol i kam long Wantok Niuspepa.

Michael M. Bip,
Suain/AITAPE.
W.S.D.

MERI KROS LONG TRIKMAN

Dia Edita.- Mi laik bekim tok bilong Gama Wampabu i kamap long Wantok Nius namba 100 long mun Septemba, 1974.

Yes, susa tok bilong yu i gutpela. Tasol ol wantok bilong yu i mekim pasin nogut long tokim ol arapela pren bilong ol long nem bilong yu, na nau ol i raitim pas long yu.

Yu yet yu mas bekim dispela pas i go long man i raitim pas long yu. Yu mas tok nogutim na krosim em na tokim em long i no ken rait gen long yu. Sapos em i no harim tok na i rait gen, orait yu save long rait bilong em pinis, brukim tasol na tromoi long paia.

Tasol watpo yu rait i go long Wantok Niuspepa na tok hambak olsem: Yu lus tru na kelaman.

Mi ting yu laik mekim

nem bilong yu i kamap bikpela na bai ol pipel i ting yu gutpela meri tru na bai ol i raitim pas long yu a?

Sori susa, mi tokim yu stret. Mi pilim olsem yu lus tru long man ya. Olsem na yu raitim ol dispela tok hambak. Kelaman em i man bilong yu ya. Bai yu maritim em. Yu gat moa? Tingting gut long ol dispela toktok yu mekim.

Sapos yu gat wari o kros, rait tasol i go long Wantok Niuspepa. Planti ol manmeri bai ritim tok bilong mi na kisim moa save na helpim long en. Maski long dispela tok bilas na

tok hambak bilong yu. Susa yu gat moa, a?
Maya Michael,
Lae.



TU MINIT TINGTING

(Dispela stori i kamap stret long namba wan buk bilong Baibel, Jenesis 6: 9 - 22. Yu ken baim long 20¢ tasol long kristen buk-stua long hap bilong yu.)

Stori bilong Noa em i olsem: Em i gat tripela pikinini man, Siem, Ham na Jafet. Noa em i gutpela man, na wokabaut bilong em i stret long ai bilong God. Em i pren tru bilong God.

Tasol olgeta arapela man ol i stap nogut long ai bilong God, na pasin nogut na pasin pait em i go pulap pinis long olgeta hap. Na God i lukluk long graun na em i lukim pasin bilong olgeta man i nogut tru. Wokabaut bilong man i sting tasol.

Orait God i tokim Noa, "Olgeta man ol i save mekim kain kain pasin nogut tru. Olsem na mi laik bagarapim ol. Bai mi pinisim tru olgeta man. Yu mas kisim plang bilong gutpela diwai na wokim wanpela sip bilong yu. Yu mas wokim sampela rum insait long en, na penim insait na ausait long kolta.....

..Bambai mi mekim bikpela tait i kamap long graun, bilong bagarapim olgeta samting i gat laip. Olgeta samting long graun bai dai. Tasol bai mi mekim kontrak wantaim yu. Yu mas i go insait long dispela sip wantaim meri bilong yu na ol pikinini bilong yu wantaim ol meri bilong ol.

Na yu mas kisim tupela tupela long olgeta kain animal, wanpela man na wanpela meri. Na yu mas bringim ol i go insait long sip wantaim yupela, bai ol i no ken i dai. Tupela tupela long olgeta kain pisin na olkain bikpela na liklik animal ol i mas go insait long sip, bai ol i no ken i dai. Na yu mas kisim kain kain kaikai bilong yu na bilong animal na pisin." Orait Noa i mekim olgeta samting olsem God i tokim em.

RIPOT BILONG Y.C. KIBUNG

Long de namba 2 inap 8 bilong Janueri 33 bik-pela lida bilong Y.C. i kibung long Alexishafen klostu long Madang.

Em hia ripot bilong ol miting bilong ol. Ol i gat 81 klap na 7034 memba bilong ol.

Ples:	Klap:	Memba:
Aitape	6	190
Alotau	8	150
Bereina	14	601
Bougainvil.	5	524
Daru	8	1,257
Goroka	1	320
Lae	4	480
Madang	8	1,468
Manus	1	44
Mendi	1	80
Mt. Hagen	8	545
P. Moresby	7	232
Vanimo	4	160
Wewak	6	256

SOSAL TRENING:

Ol lokal Bruder bilong Santu Hat i bin wok long givim trening kos long sosal wok i go inap tupela yia olgeta. I gat 6-pela man i kisim

dispela kos. Long dispela namba wan yia ol i bin wok wantaim ol man i stap insait long Bois Taun long Wewak.

Long namba tu yia bai oligo wok long ol welfe ofis bilong gavman.

Mekim sosal wok em i gutpela wok tru bilong ol Y.C. lida.

Wok bilong Lida:

Wok bilong pris o arapela kristen lida bilong Y.C. Senta em i bilong skulim ol memba bilong kristen pasin tru. Em i min olsem:

- 1) Insait long pati....
 - a. danis stret
 - b. bihain long danis no mekim pasin nogut
 - c. pasin kristen bilong boi na meri.
- 2) Insait long pilai...
 - a. no giaman
 - b. no pait
 - c. no kros, bikmaus
 - d. no bekim
- 3) Insait long wok.....
 - a. NO stii

b. no helpim wantok tasol.

RAUSIM PASIN SPAK:

Ol deliget i wari long dispela ol samting:

a. Ol memba bilong Haus ov Asembli ol i pret long tokaut egens long dring na spak. Planti bilong ol yet i givim eksampel nogut long dispela samting.

b. Yumi save toktok na givim skul, tasol dispela skul i no kamap stret long spakman. Olsem wanem?

c. Yumi mas askim ol jas na kot long salim ol man i spak oltaim bai ol i mas go mekim kos long skulim ol tru long olkain rong i save kamap long strongpela dring.

d. Ol memba bilong Y.C. yet i no ken spak.

WANEM KAIN LIDA?

Ol lida bilong bipo na ol lida bilong tude, ol i narakain.

Tupela man bilong gavman, Benson Nablu na Soamin Kilangit i bin skulim ol deliget long pasin bilong nupela lida bilong tude.

Tupela i tok olsem: ol lida bilong tumbuna em ol kain man olsem:

a. man i gat strong bilong wokim posin
b. man i save tumas long mekim bikpela kaikai na singsing.

c. man i save tumas long pait wantaim ol birua

d. man i save helpim tru ol wantok.

e. sapos em i pikinini bilong man i gat namba o pawa.

Tasol tude ol dispela samting i lus pinis, na ol pipel i laikim dispela kain man i lida:

a. man i no pret long mekim hatpela wok.

b. man i ken stapim pait.


c. man i save gut long stretim kros na tok.

d. man i no save giaman.

e. man i save tumas long paitim toktok.

f. man i no belhat, tasoli ken skelim gut ol tok na pasin.

g. man i gat save tru.



h. man i save strongim bel bilong ol pipel.

i. man i save wok wantaim olgeta kain man.

Tupela man i tokaut long tripela samting bilong tude olgeta pipel i longlong tru long en na i no inap save liklik. Em tripela hia:

1) aidia bilong vot na ilektim gavman.

2) koalisen gavman em i min wanem samting tru?

3) Oposisen Pati em i wanem samting tru na em i mekim wanem wok?

HUSAT I KRISTEN LIDA?

Ol Y.C. lida i no lida nating. Nogat. Ol i mas kristen lida tru.

Orait. Kristen lida em i wanem kain man tru? Em hia:

a. Em yet i gutpela kristen man o meri.

b. em i save tingting na wari long narapela man.

c. em i no krai long pe na mani olsem bekim bilong gut pasin bilong em

d. em i man bilong tok tru oltaim.

e. em i man bilong bihainim lo.

f. em i man i save pulim ol arapela man long gutpela eksampel bilong em yet.

g. man i save tumas long paitim toktok.

h. man i no belhat, tasoli ken skelim gut ol tok na pasin.

i. man i gat save tru.

Guise Helpim Wantok

Dokta John Guise, Minista bilong Egrikalasa, i tok dipatmen bilong em bai salim ol ka i go long Alotau na Popondetta long karim prut, sayor na pis i go long gavman maket, long Port Moresby.

Ol dispela ka inap tru long helpim ol pipel bilong Milne Bay na Noten Distrik long statim liklik bisnis na winim wan siling.

Mipela inap wokim

OLKAIN SAMTING LONG KANDA

SALIM MANI I KAM

WANTAIM ODA

lukim ol prais hia


Autim laik bilong yu tasol

**olkain sia
olkain tebol
olkain basket
blain pangal**

Mipela ken salim long sip o balus. Rait tasol i go long:

**CANE INDUSTRY
PES-AITAPE, W.S.D.**

Bisnis bilong ol lokal pipel stret



stori bilong tumbuna

SIMBU STORI

Long bipo, bipo tru long taim bilong tumbuna. long wanpela ples insait long Simbu Distrik ol i kolim Sina Sina i gat wanpela lapun man i stap. Em i gat meri wantaim tupela pikinini. Wanpela i boi na narapela i meri. Nem bilong boi em Dumun na meri Okenel.

Long wanpela taim sik mun i kisim Okenel. Olsem na Okenel i stap insait long haus tasol, na i go inap tupela o tripela wik. Long pasin bilong tumbuna, meri i kisim sik mun i stap olsem na taim em i laik i kam ausait ol papamama na lain bilong em mas kukim kaikai na wokim liklik pati bilong meri. Tu taim meri i kamaut o sik mun bilong em i pinis, em i ken i go na stat singsing na slip wantaim yangpela boi long haus meri.

Olsem na taim brata bilong em Dumun i harim dispela tok em i kisim banara wantaim spia bilong em wantaim sampela nupela kaukau na i stat long wokabaut i go long bikbus long taim ol pipel i kukim kaikai bilong susa bilong em.

Bihain long wanpela longpela wokabaut, Dumun i kamap long wanpela bikipela maunten klostu long bikbus, na taim em i lukim olsem bai tudak,

em i stat long brukim paiawut bilong kukim kaukau bilong em. Taim em i brukim han bilong wanpela diwai, wanpela samting i pairap na ai bilong Dumun i raun na em i pundaun long graun hap indai.

Bihain em i harim olsem nek bilong man na em i kirap isi isi na lukim wanpela gutpela meri tru, man i no save lukim insait long Sina Sina. Nau meri hia i askim Dumun long karim bilum kaukau bilong em. Tasol Dumun i no laik. Tasol tewelmeri i wok long askim em yet, olsem na Dumun i pret na em i karim bilum i go.

Tasol taim tupela i wokabaut, tewelmeri i wok long tromoi kaukau wan wan i go long bikbus. Na taim kaukau i pinis, em i tromoi bilum i go. Na bihain em i askim Dumun long karim banara wantaim spia. Taim Dumun i larim em i karim, tewelmeri hia em i tromoi i go long bikbus. Dumun i kros nogut tru, tasol em i no save meri i kam we olsem na tupela i go insait moa long bikbus.

Klostu i laik nait tupela i kamap long as bilong wanpela kain diwai mipela i kolim Karuka. Karuka hia i narapela kain i gat longpela stik bilong em na i gat



strongpela pikinini tu. Na long as bilong diwai hia i gat gutpela pikinini prut long en. Welmeri hia i tokim Dumun long kisim tupela prut. Na taim em i brukim, diwai i pundaun na i op na tupela i wokabaut i go insait. Nau tupela i stat kaikai ol kaikai welmeri i bin kukim pinis. Tupela i bin stap long diwai hia em i ples bilong tewelmeri inap sampela mun i go pinis. Na long ples bilong boi.

Tasol long ples bilong Dumun, susa bilong em Okenel i kamaut pinis na ol lain bilong em i lusim tingting pinis long Dumun.

Long wanpela moning, boi na welmeri i kamap long ples bilong Dumun. Ol man, meri na pikinini i lukim Dumun na

kirap nogut tru. Ol i ting em i dai pinis. Olgeta man, meri na pikinini insait long ples i kaikai pik.

Tasol tupela i no bilip long wanpela sanguma meri. Olsem na sanguma meri hia wok long lukluk strong tru long tewelmeri. Na tewelmeri hia i lukim em, na taim em i laik katim sampela pik, em i katim han bilong en ya. Welmeri hia i guriana pret wantaim, olsem na em i katim na popaia long katim pik. Em i katim pinga long han bilong em ya, na blut i ran olsem wara stret.

Nau tewelmeri hia i sanap tingting tumas na tingting bilong em i faul tru. Na em i stat long ran i go pas, tasol


(i go moa long pes. 6)



OLABOI... KUS BILONG YU I STRONG MOA YET...



HIA... KAIKAI DISPELA ASPRO TEBLET WANTAIM WARA.



EM NAU... PEN LONG NEK I RAUS PINIS, NA YU INAP PULIM WIN ISI GEN...

Nambawan marasin bilong olgeta pen

MICROFINED FOR RAPID ABSORPTION
CONTENTS: 25 TABLETS

'ASPRO'

FOR HEADACHE, PAIN, COLD & FLU SYMPTOMS



Lokal gavman kaunsil ofisa long olgeta hap bilong Papua Niugini i bin kisim wanpela kain skul bilong yusim niuspepa na redio bilong autim toktok long olkain wok bilong ol lokal gavman kaunsil.

Em i wanpela kos tasol Vunadidir Lokal Gavman Ofisa Koles i bin givim long wanpela woksap i bin i go inap 5-pela wik olgeta. Em long mun Septemba na Novemba long Gazelle. Mis Josie Runes bilong Filipin Ailan, Dairekta bilong Toksave na Buk Dipatmen bilong Yunaitet Sios long Rabaul i bin givim dispela skul.

Long woksap hia i bin i gat skul na toktok

long wok bilong redio na niuspepa, na pasin bilong raitim niuspepa, na tu ol i bin lukim redio i gat piksa em ol i kolim televisen.

Long pinis bilong kos ol skulman i go lukluk raun long ol Nesenel Brotkas Komisin studio na niuspepa dipatmen. Na tu ol i go lukluk long ofis bilong Poskoria Niuspepa, na ol i lukim wanpela masin ol i kolim teleks. Dispela masin em i bilong salim na kisim nius long olgeta hap bilong graun. Ol i bin go lukluk raun tu long Trinita Pres na lukim pasin o we bilong prinim nius. Ol studen ya i wokim wanpela liklik niuspepa bilong ol,

Long miting bilong Kabinet long Januери ol i bin orait long dispela ol samting:

- 1.) Independens De bai kamap long Jun 8.
- 2.) Bai gavman i wokim 500 prais medal bilong tilimaut long ol manmeri bin mekim bikpela wok tru long helpim go het bilong PNG.

Medal ya bai ol i givimaut olgeta yia long independens De.

Long wanpela sait bilong medal bai i gat sil bilong PNG: em spia na kundu na kumul. Long arapela sait bai i gat poto bilong kwin.

Mista Somare i tok: bihain long independens yumi laik stap insait long komonwelt o famili bilong kwin; olsem em i mas stap long medal bilong mipela.

- 3.) Kabinet i orait long gavman i baim 25 Mercedes Bens ka. Ol i tok em i bilong independens de selebren na bilong karkarim nabaut ol bikpela man bilong narapela kantri taim ol i kam lukluk raun long PNG.

4.) Kabinet i laik onaim na yusim save bilong ol olupela saiden insait long plis fos. Maski ol i no gat planti skul; ol i mas kisim namba antap moa na soim pasin tru bilong ol plisman long ol yangpela man insait long lain bilong ol.

5.) Bai ol i makim nupela Minista bilong Jastis long kibung bilong Februeri.


6.) Bai Mista Somare i go long ailan Nauru long pinis bilong mun Januери. Bihain long kibung bilong Haus ov Asembli long Februeri bai em i go long Filipin Ailan.

7.) Sir Maori Kiki bai go long kantri Saina long namba wan de bilong Februeri. Hia bai em i toktok wantaim ol long salim olkain samting long mipela na baim tu ol samting bilong PNG. Sir Maori Kiki i laik lukim olkain pasin go het o developmen bilong olkain smolpela bisnis na bilong ol liklik fama i save sindaun long ples yet.


Nau yu ken kisim tok i kam long olgeta hap bilong graun

Ating yu laik harim tok i kam long Englan.....
 o yu laik harim musik i kam long Yurop
 o kisim Sydney o Melbourne o Canberra.....
 o yu laik kisim olgeta stesin bilong Papua Nu Gini.....

ORAIT, YU BAIM DISPELA REDIO NA YU WIN.



R 358 B
 Deluxe Portable (3 Band MW/SW1/SW2)
 12 Transistor 4 - Diode
 2 Speakers with big output
 Easy to read "Magic Meter"



R 247JB/HB
 A/c/Battery operation 2 Band MW/SW
 8 Transistor in Leatherette Cabinet



RF 399
 Tuned RF Stage, 12 Transistors
 3 Band (MW/SW1/SW2)
 Signal strength meter
 fine tuning.



BURNS PHILP (New Guinea) LTD
 i save salim na fiksिम



STORI TUMBUNA

(i kam long pes 5)

Dumun i sori nogut tru na i wok long bihainim blut na ranigo bihain. Taim Dumun i kamap bek long ples, em i tokim ol man long ples. Nau ol i kolim abus hia long tok ples "Noko". Mining bilong em olsem, ol man i no save meri hia i kam long wanemples.

Na wanpela diwai karuka hia olkolim Dumun. Na tu long dispela ples long wanpela taim i gat planti long ol dispela karuka Dumun. Olsem na tu, tude i gat wanpela ples insait long dispela liklik ples nem bilong em Dumun.

Yogomul Gaima,

NAMBA WAN LONG NU SILAN



N.Z. FOTO

Long mun Desemba Mista Michael Somare, Namba Wan Minista bilong Papua Niugini, i bin opim wan-pela gavman komisin ofis bilong yumi long biktaun Wellington, long Ailan Nu Silan.

Papua Niugini em i namba wan kantri bilong Saut Pasifik i gat dispela kain diplomatik ofis long kantri Nu Silan.

Em hia yumi lukim long poto Mista M. Somare, Namba Wan Minista bilong PNG long lephan, Mista W.E. Rowling, Praim Minista bilong Nu Silan na Mista Leo Morgan, Komisina bilong Papua Niugini long Wellington.




FIJI SAN FOTO

Long mun Desemba Mista Michael Somare, Namba Wan Minista bilong Papua Niugini na Ratu Sir Peniau Ganilau namba tu Praim Minista bilong Fiji i bin opim narapela Papua Niugini Gavman Komisn, dispela taim long Suva, Fiji.

Komisina bilong PNG long Fiji, Mista Evertius Romney tu i bin i stap insait long dispela bik-pela pestode.

Long poto antap yumi lukim Mista Somare long lephan, Sir Peniau Ganilau na Mista Romney i sanap insait long ofis bilong Komisina bilong Papua Niugini long Suva.

NAMBA WAN KAIKAI BILONG OL FAMILI



Lukautim bai tripela kaikai hia i swit na i gat strong long en i stap oltaim long haus bilong yu.

HEINZ kompani i yusim gutpela samting tasol bilong wokim ol dispela kaikai. Sapos yu laik hariap redim strongpela kaikai - na tomato sauce i gutpela tru na swit moa - lukautim mak bilong HEINZ.

2167E




Namba wan minista, Mista Michael Somare, i sindaun na givim olkain nius long 9-pela niusman bilong Papua Niugini, Australia, Nu Silan, na Englan. Ol i sindaun long nambis stret, arere long Windjama Hotel long Wewak.



Hia yumi lukim kabinet bilong Papua Niugini taim em i kibung long Wewak long Janueri. Kirap long lephan ya yumi lukim: Mista Julius Chan (Minista bilong ol Beng na Mani), Mista John Poe (Minista bilong Interia), Mista Iamakey Okuk (Minista bilong Transpot), Sir A. Maori Kiki (Minista bilong Difens, Tret, na Foren Rilesen), Mista Ebia Olewale (Minista bilong Bisnis), Mista Gavera Rea (Minista bilong Nesenel Developmen), Mista Kaibelt Diria (Minista bilong Pos na Telegrap), Mista Michael Somare (Namba Wan Minista na Minista bilong Jastis na Infomesen), Dokta Reuben Taka (Minista bilong Edukesen), Dokta John Guise (Minista bilong Egrikalsa), Sir Paul Lapun (Minista bilong Mains na Enesi), Mista Boyamo Sali (Minista bilong Ol Lokal Gavman Kaunsil), Mista Thomas Kavali (Minista bilong ol Graun.)



Kabinet i go kisim kaikai long nupela kalsa senta long Wewak. Hia tu ol i lukim olkain kaving na arapela nais-pela samting bilong ol tumbuna bilong Is Sepik Distrik.




Mista Boyamo Sali bilong hap bilong Iae i sindaun wari long ol lokal gavman kaunsil na nupela eria autoriti.

Mista Pita Lus i save bosim olgeta plisman na woda. Mista Philip Bouraga i bosim olgeta distrik komisina.

KABINET BILONG PAPUA NIUGINI

Daunbilo ya yumi lukim kabinet i kibung long nupela rum miting insait long ol nupela Distrik Ofis long Wewak. Em i namba wan taim i gat wanpela kibung long dispela rum.



Sir Paul Lapun, em i namba wan man bilong PNG i kisim dispela ona long kwin. Em i bilong Bougainville. Sir Maori Kiki, nupela nait, em i bilong Kerema.



GEL GAIT NO LAIKIM SYDNEY

Long de namba 21 bilong Janueri, Mis Rachel Rossi, namba wan gel gait bilong olgeta Papua Niugini bilong yia 1974, em i bin lusim Australia na kam bek long Port Moresby.

Em i bin i stap long Australia na go long gel gait kemp long Maun Keira klostu long Sydney long Janueri 8 na 9.

Mis Rossi em i wanpela patrol lida bilong Mt Hagen Gel Gait Grup. Krismas bilong em 14 na em i stap long fom 2 long Mt. Hagen Haiskul. As ples tru bilong Mis Rossi em i Lae. Tasol em i bin i stap long Mt. Hagen inap 7-pela yia olgeta wantaim famili bilong em.

Wokabaut bilong em long Australia em i prais PNG Gel Gait i bin givim long em, long



Mis Rachel Rossi

wanem em i kamap namba wan bilong ol.

Mis Rossi i tok em i no laik stap long bik-taun Sydney, long wanem ples i pas tumas. Em i laikim tru Papua Niugini, long wanem i gat planti spes. I bin i gat moa long wan handet meri bilong Australia tu i stap insait long dispela kibung bilong ol gel gait.

LAIN MAN BILONG SKELIM GRAUN

Em hia nem bilong ol man i stap long Len Bot, em lain man i save skelim tok bilong ol pipel i pait long graun long wan wan distrik:

Bougainville: John Dakeni, John Kungkam.
Sentral: Eric Rowe.

Simbu: Martin Nombri, Robert Frederick Hueter
Is Nu Briten: Henry Tomatamatam, Dimaine Tokurapa.

Is Sepik: Labu Yawimberi, Petrus Siaguru.

Isten Hailans: Atau Waukauvi, Kumoro Vira.

Enga: Leo As, Wais Waima, Yongi Waitea, Pongo Iliap, David Wei.

Galp: Avia Apao, Ope Oeaka,

Madang: Aksim Simming, Paul Kamod.

Manus: Peter Pomat.

Milne Bay: Peni Frank Tarua, Mahuru Mark.

Morobe: Muttu Gware.

Noten: Eric Eupu, Napoleon Ikoirere.

Nu Ailan: Horatius Igua, Peter Tapural.

Sauten: John Nono Kara, Stephen Songen.

Wes Nu Briten: Mango Goru.

Wes Sepik: Moihe Dapri.

Westen: Tabua Inabi, Ebani Kirori.

Westen Hailans: Wamp Wan, Johannes Leahy.

ASUA BILONG HUSAT?

dispela kantri.

Em i wari nau bikos Dokta Guise, Minista bilong Agrikalsa, i hat-wok long painim mani na wok moa nau long skulim i no gat wok. Tasol wamol pipel long planim ol-nem skul i givim save kain kaikai inap long long planim gaden?

Ol WANTOK niuspepa bilong dispela yia, stat long mun Janueri inap long mun Jun, i stap nau insait long wanpela buk.

* * *

Dispela WANTOK buk bai i kamap TUPELA TAIM long wanpela wanpela yia long mun Ogas na long mun Februeri.

* * *

Dispela WANTOK buk i nambawan samting bilong

- * helpim ol sosel stadi klas long skul
- * helpim ol adalt edukesen klas i go het
- * helpim ol i laik skul long TOK PISIN
- * putim insait long ol skul laibreri

* * *

I no gat planti WANTOK buk. Sapos yu laik kisim wanpela, hariap makim tiket i stap hia na putim mani wantaim na salim i kam.

WANTOK PUBLICATIONS, Inc.
P.O. Box 396,
Wewak. P.N.G.


Mi laik baim WANTOK buk.

Nem bilong mi:

Adres bilong mi:

.....


Prais bilong wanpela buk:
\$2.00 (+ 20¢ bilong baim stem)
\$2.00 (+ 45¢ bai em i kam long balus)



NUPELA STEM SOIM KAIN KAIN KANU BILONG P.N.G.



Lukim
Bikpela
Pati
Bilong
Februeri



*Long dispela mun mipela i laik
salim olgeta trak na taia bilong mipela.*

HARIAP!

Yupela kam baim nau.

BOROKO MOTORS LTD


B&G MOTORS, WEWAK - RABAU' GARAGE - ARAWA MOTORS

SINGER

*A Trademark of The Singer Company



PREN BILONG YU INAP OLTAIM



Mis M.B. Wutsik

Long de bilong gredu-
esen long mun Novemba,
1974, Mis Marilyn B. Wut-
sik, i bin kisim namba
wan prais bilong paitim
masin bilong rait, na
tu em i winim tru skul
long ol narapela studen
long Madang Seketerial
Koles.

Mis Wutsik em i bi-
long Pokorumb viles
klostu long Banz, W.H.D.
Long poto hia yumi luk-
im Mis Wutsik i paitim
masin i stap long skul.

Singsing
Bilong
P. Niu Gini

1
YU-MI OL BRA-TA YU-MI OL WAN-LAIN YU-MI OL
YU-MI OL BRA-TA YU-MI OL WAN-LAIN YU-MI WAN

PI-PEL BLONG WAN KAN-TRI LA-RIM KROS NA PAIT I DAT. LAIK TA-SOL I
PI-PEL BLONG NIU GI-NI

Long 15 Januери resis
bilong painim nesene
song bilong Papua Niu-
gini i pinis.

Siaman bilong dispela
komiti, Mista Kwamala
Kalo, i bin tok ol i bin
kisim 23 song. Sampela
i bin kam long Australia
na Japan.

Long Februeri dispela
komiti bai kibung long

Rabaul bilong skelim ol
song ya.

Sampela pipel i bin
salim song i kam ol i
bin mekim kranki. Sam-
pela i bin stilim musik
long wanpela narapela
song. Em i no stret; ol
yet i mas raitim musik
bilong song.


Na planti narapela ol
i bin salim tok tasol i

kam; no gat musik bilong
en. Em tu i no inap.

Bai komiti i makim
5-pela song bilong traim
na bai NBC i brotkasim
ol 5-pela inap long 3
wik stret bai olgeta
manmeri inap harim gut.

Bihain ol pipel yet i
mas tok wanem song ol
yet i laikim olsem ne-
senel song bilong PNG.

PENTA-VITE



PENTA-VITE

**DISPELA
MARASIN I BILONG
STRONGIM OL
PIKININI
NA MEKIM OL I GRO
KWIKTAIM**

yu ken baim long olgeta stua marasin

The Phantom

®

By Lee Falk and Sy Barry



Wokim Sip Long Diwai Bilong Bus



Nau long Rabaul wan-pela nupela bot i wet i stap long kisim tiket. Bot hia em MV Mailuesi. Longpela bilong dispela bot i 36 fit, na 18 man i wokim long diwai bilong bus ol i katim long han na tu long ol samting bilong woa ol i painim long Emira Ailan klostu long Nu Ailan.

Bot hia i kostim moa olsem \$8,300 na Nu Ailan Eria Autoriti i

givim \$8,000 long dispela mani.

Mista Maingen Silau em i kepten na ensinia bilong dispela bot. Em i tok long taim ol i stat long wok long dispela bot, planti bilong ol pipel i bin i gat laik long baim wanpela nupela bot; ol i no laik wokim wanpela. Bihain man i wokim pinis tok na kros bilong ol i dai.

Olsem na ol i givim

Dispela monki em i kisim pasin pinis bilong pilai kat. Tasol em i lukluk nabaut long painim poroman. I gat tupela poroman i wet long pilai. Tasol tupela i hait i stap we? Yu inap painim?



nem Mailuesi long em. Nem Mailuesi i min olsem "Yupela i kam bringim gutpela taim".

Wanpela bot inap long dispela i save kostim inap \$19,000. Na ol i wokim long \$8,300.

Ensin bilong bot ya i bilong Japan. Na taim ol i laik putim insait long sip, ol man i tok-tok planti long winisim na putim insait long sip. Tasol 8-pela strongpela man i litimapim nating na putim insait i stap.

Sip hia i save ran inap 8 not long aua na i ken karim 22 pasindia. Namba wan wok bilong Mailuesi em long karim kopra i go long Kavieng Bai 4-pela man i kamap boskru bilong Mailuesi na ol arapela wokman i laik wokim 2-pela bot gen inap long 25 fit.

Bipo Kepten Silau em i wokman bilong Huaphuing Shipbuilding Company long Rabaul. Em i bin wok olsem mekanik 2-pela yia bipo long em i bin go wokim sip bilong em.

BIKPELA MAN ANTAP

Nating papa bilong yu i telimautim long yu ol pasin bilong ol tumbuna? Sapos wanpela pikinini i gat bikpela sik, na sapos ol samting bilong gaden bilong wanpela man i no kamap gut, papa i singaut long tumbuna bilong em bipo indai pinis i mas rausim dispela sik na em i mas mekim ol samting bilong gaden bilong em i kamap.

Tasol sapos wanpela sik nogut i kamap long planti manmeri, na sapos olgeta gaden i bagarap, ol man i bung long givim ofa long "Bikpela Man Antap." Long man i kamapim olgeta samting.

Ol i kilim planti pik, ol i mumuim na givim long bikpela papa antap long klaut. Ol i tok: "Nau bikpela bilong mipela i ken stretim olgeta samting." Bambai ol sik na hangre i pinis. Na olgeta gaden bilong mipela i ken karim planti kaikai tru. Na mipela i ken gat planti pik, na mipela i painim planti abus. Bikpela papa antap i mekim gut long mipela.

BAIM WANTOK

Sapos yu wanpela yu laik kisim WANTOK i kam long yu stret, orait yu salim dispela tiket i kam:

Mi laik kisim WANTOK niuspepa inap wan yia olgeta. Nau mi salim \$4 (foa dola) i kam;

Nem:

Adres:

Salim i kam long :

WANTOK - P.O. BOX 396 - WEWAK

DISPELA ASPRO BILONG OL PIKININI

RESEARCH LIBRARY



JUNIOR

...em i swit... ol i tanim wantaim wara bilong muli

Wok bilong em bilong rausim:

FIVA - HET I PEN TIT I PEN - KUS

Skel bilong givim long ol pikinini i olsem:

Pikinini i gat

1 inap 2 yia = kisim 1-pela kinin Aspro Junior

2 inap 4 yia = kisim 2-pela kinin Aspro Junior

4 inap 7 yia = kisim 3-pela kinin Aspro Junior

7 inap 12 yia = kisim 4-pela kinin Aspro Junior

Givim marasin olgeta 4-pela 4-pela aua.

ASPRO
REGD. TRADE MARK

JUNIOR

Tambu long givim Aspro long pikinini i no gat 1 yia yet.

YU KEN BAIM LONG OL STUA MARASIN

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.